

मार्निंग डोगरी न्यूज बुलेटिन, समें. 09.20 Hrs

<><><><><><>

### Headlines

1. उपराज्यपाल मनोज सिन्हा होरें आखेआ ऐ जे जम्मू-कश्मीर अपने स्वर्ण काल दी गाथा सभ्भनें वर्गे गी बरोबर दे मौके देइयै लिखा'रदा ऐ।
2. मुखमंत्री उमर अब्दुल्ला होरें पच्छिम बंगाल दी मुखमंत्री हुंदे कन्नै मलाटी कीती ते आपसी हित ते सहयोग दे मामले बारै चर्चा कीती।
3. सुरक्षाबलें पुंछ जिले च आतंकवादिएं दी छप्पने आहली थाहर गी तबाह करिए उत्थुआं असला बरूद बरामद कीता।
4. श्री अमरनाथ जी दी पवित्तर गुफा च अजें तगर 1 लक्ख 45 ज्हार थवां बद्द श्रद्धालुएं मत्था टेकेआ। 6 ज्हार 400 थवां बद्द श्रद्धालुएं दा 10मां जत्था जम्मू थवां घाटी लेई रवाना होआ।
5. जम्मू रेलवे स्टेशन गी होर बेहतर ते विकसित कीता जा'रदा ऐ तां जे बेहतर संपर्क कायम होए ते जात्रिएं गी होर मती सुविधा हासिल होई सकै।

-----  
<><><><><><>

## LG-Exhibition

लेफ्टिनेंट गवर्नर मनोज सिन्हा होंरें आखेआ जे जम्मू-कश्मीर वंचित वर्गें, करसानें, महिलां ते नौजवानें गी बगैर फर्को-फर्की दे इक्को ज्नेय अवसर प्रदान करियें स्वर्ण काल दी कहानियां लिखा'रदा ऐ। एल.जी होंरें एह गल्ल भारत संरचना जम्मू-कश्मीर 2025 दी नमैश दा उद्घाटन करदे होई आक्खी जेड़ी सार्वजनिक पुज्ज दी इक्क पहलकदमी ऐ। इस नमैश दा उद्घाटन कल श्रीनगर च कीता गेआ। इस मौके बोलदे होई सिन्हा होंरें आखेआ जे अमृत काल दे सफर च अगले 22 साल जम्मू-कश्मीर आस्तै सनैहरे होडन जेकर अस नमी पीढ़ी गी भारत गी विकसित बनाने दे अवसर प्रदान करगे। इस बारें होर गल्ल करदे होई एल.जी होंरें आखेआ।

<><><><><><><><>

## CM-WB

मुख्यमंत्री उमर अब्दुल्ला होंरें अपने कोलकाता दौरें दरान पच्छिम बंगाल दी मुख्यमंत्री ममता वैनर्जी हुं'दे कन्नै मुलाकात कीती। इनें द'ऊं लीडरें अंतर राज्य सांझेदारी दे अवसर बदाने ते आपसी हित दे मामलें पर चर्चा कीती। इस बारें गल्ल करदे होई मुख्यमंत्री उमर अब्दुल्ला होंरें आखेआ।

जातरा च सैलसफा मेले यानि टी.टी.एफ कोलकाता 2025 दे मौके पर मुख्यमंत्री उमर अब्दुल्ला होंरें प्रेस कनै बी गल्लबात कीती ते गल्ल करदे होई उनें जम्मू-कश्मीर दे सैलसफा दे बेशुमार

समर्थ उप्पर जोर भरेआ ते आखेआ जे केंद्र शासित प्रदेश गी हर मौसम लेई जातरा आस्टै अनुकूल बनाने लेई इत्थूं दी सरकार पूरे जत्न करा'रदी ऐ।

<><><><><><>

## JK-Arma Seizure

पुंछ जिले च सेना ते पुलस दे विशेष दस्ते आसेआ चलाए गेदे सांझे अभियान दरान च आतंकवादी ठिकाने गी तबाह करी दिता गेआ। सुरक्षा बलें पुंछ जिले दे खनेतर टॉप इलाके च आतंकवादी ठिकाने दा पता लाइयै उसी कामयाबी कन्नै तबाह कीता। एहदे शा पैहले सुरक्षाबलें इलाके च किश आतंकवादियें दी मौजूदगी बारे थहोई दी इक पक्की सूह दी बिनाह उप्पर कार्रवाई करदे होई खनेतर टॉप इलाके च घेराबंदी ते तपाशी अभियान शुरू कीता। इस तलाशी अभियान च सुरक्षाबलें थेआरें ते गोला-बरूद दा महत्वपूर्ण ज़खीरा ज़ब्त कीता ऐ, जेहदे च 2 मैगज़ीनां ते 9 एमएम दे 24 कारतूस सने 2 पिस्तौलां, 6 हथगोले, इक अंडर बैरल ग्रेनेड लॉन्चर, इक इलेक्ट्रॉनिक डेटोनेशन सेट दे कन्नै 2 आईईडी विस्फोटक ते होर बी विस्फोटक समग्री शामिल ही।

<><><><><><>

## JKEDI

जम्मू-कश्मीर उद्यमिता विकास संस्थान नै अपे पाम्पोर कैंपस च उद्यमिता ते स्टार्ट अप बारै मुलाकात कीती। इस मौके पर 20 स्टार्ट अप स्टॉल लोआए गे, गल्लबात आस्टै सत्र करोआए गे ते इत्थे बक्ख-बक्ख अनवेषक बी शामिल हे जिनें उद्यमिता दे राएं युवाएं गी सशक्त करने पर जोर भरेआ। उपमुख्यमंत्री सुरिंदर चौधरी होरें इस मौके पर मुख्ख परौहने हे। उनें युवा उद्योगें

दे उत्साह दी सराहना कीती ते सरकार दी जम्मू-कश्मीर स्टार्ट अप इको सिस्टम गी बदाने आस्तै बचनबद्धता उप्पर बी जोर भरेआ। मीडिया कन्नै गल्ल करदे होई उपमुखमंत्री होरें आखेआ।

<><><><><><>

### CS-Independent Day

मुख्य सचिव अटल डुल्ल होरें उच्च सतह दी इक बैठक लाइयै औने आहले स्वतंत्रता दिवस दी तैयारिएं दा जायजा लैता। उनें इस समारोह लेई थाहर तैयार करने, सांस्कृतिक कार्यक्रम, सुरक्षा इंतजाम ते ट्रैफिक प्रबंधन दा जायजा लैता। उनें अफसरें गी हिदायत कीती जे ओह साफ-सफाई, पीने आहले पानी, बिजली सप्लाई, लाइटां लाने बगैरा आहले कम्में गी समेंसिर यकीनी बनान। फुल ड्रेस रिहर्सल 13 अगस्त गी होग। जम्मू-कश्मीर पुलिस, सी.आर.पी.एफ, सीमा सुरक्षा बल, एनसीसी ते स्कूली बच्चें दे दस्ते, श्रीनगर ते जम्मू च होने आहले मुख्य समारोहें च शामिल होडन।

<><><><><><>

### Amarnath-Yatra

कश्मीर घाटी च रूकी-रूकिए बरखा पौने दे बावजूद बी श्री अमरनाथ जातरा भक्ति ते उत्साह कन्नै जारी ऐ। हुनै तोड़ी कुल 1 लक्ख 45 जहार शा मते श्रद्धालुएं गुफा च शिवें दे हिमलिंगम रूप दे दर्शन करी लैते देन। जातरा दे 8में दिन 17 जहार 22 श्रद्धालुएं पवित्र गुफा च मत्था टेकेआ। तोआई, अज्ज बड्डलै 6 जहार 482 श्रद्धालुएं दा इक्क होर जत्था

सख्त सुरक्षा इंतजामें हेठ जम्मू दे भगवती नगर थमां घाटी लेई रवाना होआ। एह श्रद्धालु 268 गड्डियें दे काफले च सवार होइयै अगड़ी जातरा लेई रवाना होए। इन्दे च 4 जहार 838 मर्द, 1 जहार 387 महिलां, 16 बच्चे, 171 साधु ते 70 साध्वियां शामिल हियां। भक्ति भजन गां दे होई श्रद्धालुएं अपने विचार सांझा करदे होई आखेआ।

तोआई, पवितर छड़ी मुबारक पहलगाम पुज्जी गई ऐ। री अमरनाथ जी दी जातरा लेई इस बरे 4 लख थमां बद्द श्रद्धालुएं अपना पंजीकरण कराए दा ऐ। सलाना जातरा 9 अगस्त गी सम्पन्न होई जाग।

<><><><><><>

### Jammu Railway Station

जम्मू-कश्मीर च रेल ढांचे गी होर तगड़ा करने लेई जम्मू रेलवे स्टेशन पर केई सारे विकास कम्म कीते जा'रदे न। सीनियर डिविजनल कमर्शियल मैनेज उचित सिंगल होरें जानकारी दिती जे इत्थू बाद्दू प्लेटफार्म्स, नमें एंट्री प्वाइंट्स होडन ते होर दुए सुविधाएं च बी बाद्दा कीता जा'रदा ऐ। इस स्टेशन गी विश्व स्तरीय मानकें मूजब आधुनिक सुविधाएं कन्नै लैस कीता जा'रदा ऐ। एहदा मकसद बेहतर राबता कायम करना, सैलसफा गी बढ़ावा देना ते खिते दे आर्थिक विकास च मदद देना ऐ। होर जानकारी दिंदे होई उचित सिंगल होरें आखेआ।

<><><><><><>

## Basohli-Festival

जम्म् दे डिविजनल कमिशनर रमेश कुमार होरें बसोहली दा दौरा लाया ते औंदे सलाना बसोहली उत्सव दी तैयारिएं दा जायजा लैता। एहदा मकसद खिते दी समृद्ध सांस्कृतिक विरासत गी बढावा देना ऐ। उनें समुदार्यें, कलाकारें, आई.आई.टी ते आई.आई.एम दे विद्यार्थियें गी बी शामिल करने लेई आखेआ तां जे इसी होर बी बेहतर कीता जाई सकै। होम स्टेज ते मुकामी विक्रेताएं गी बी बढावा देने लेई योजना शामिल करने लेई आखी गई ऐ। इस उत्सव लेई 15 कमेटिएं दा गठन कीता गेआ ऐ जेड़ियां सरबंधी चीजें गी दिक्खडन। होर जानकारी दिंदे होई उनें आखेआ।

<><><><><><>